

衡戡以胡展丈遺詩卷子屬題

徐信符

卽次原韻歸之

灑落遺留澆墨痕，孝思錫類本天根。克勤更念民生重，不屈猶徵士氣存。展卷我如親叔度，買絲君合繡平原。茫茫肝膽知誰是，但慨脂韋世所尊。

衡戡以胡展堂翁遺詩卷子屬題

葉次周

卽次原韻歸之

閒來披卷認春痕，各寫孤衷證道根。勳望自然人共惜，風流彌歎影空存。死何可作歸奚著，薪幸能傳道許原。我憶談詩聆緒論，海天曾仰斗山尊。

乙亥雜憶

李仙根

莫笑談瀛氣味長，看春一路到重陽。秋心未共江湖盡，歸及黃花晚節香。誰謂師言非敵手，死中求活是全棋。鏡人一着知何補，數子拋殘已足悲。江柳江花六代愁，四年何計此淹留。雲煙過眼都如夢，最憶湖山一段秋。夢回香國春三月，薄命風花勝幾枝，不是無情忍離散，飄零已定未開時。

聞客談江門戰訊

黃伯軒

出門何處望江門，豈不懷歸大地昏。外海濤翻胡馬血，三台人上鴉鴿原。當年羣鶴乘軒樂，今日遺民清野言。燔盡故園春後草，中林不異本根存。

昆明雨齋花下

劉衡菴

花底香酣冒曉烟。一庭春物綠陰圓。牡丹紅藥遲余放，斟酌情懷異去年。

湖夜

纖月中懸幾化更。縈迴鎗火徹宵明。愛疑為職人常夢，物我俱忘酒有情。聽水橋闌光亂颭，種蓮池曲蛤交聲。無眠此夜清暉共，不補當前著句成。